

Izjava: U aprilu planirani finalni pregovori o reorganiziranju policije

Visoki predstavnik, Paddy Ashdown, se danas u Londonu sastao sa ministrom vanjskih poslova Velike Britanije, Jackom Strawom.

Visoki predstavnik je kratko informirao ministra vanjskih poslova o napretku koji je Bosna i Hercegovina ostvarila u ispunjavanju 16 uvjeta iz studije izvodljivosti Evropske komisije. Napominjući da je komesar za proširenje Evropske unije danas uputio pismo premijeru Terziću u kojem je istakao oblasti u kojim još uvijek treba ostvariti značajan napredak, visoki predstavnik je rekao da reforma policije i dalje ostaje jedna od preostalih ključnih reformi koje zahtijeva EU kako bi Bosna i Hercegovina mogla započeti pregovore o potpisivanju Sporazuma o stabilizaciji i pridruživanju.

Visoki predstavnik je naglasio da je komesar Rehn u svom pismu jasno istakao kako bi prije održavanja sastanka Konsultativne radne grupe u maju, državni i entitetski Parlamenti «trebali postići koncenzus i dogovoriti jasan plan za provedbu reforme policije u skladu sa osnovnim principima koje je utvrdila Komisija za restrukturiranje policije.» Visoki predstavnik je rekao kako očekuje da će političke stranke u BiH do kraja aprila okončati formalne pregovore o tekstu parlamentarnog sporazuma.

Komentarišući činjenicu da je u protekla tri mjeseca sedam optuženika za ratne zločine otputovalo u Hag, visoki predstavnik je rekao da «stara devetogodišnja politika opstruiranja procesa u Republici Srpskoj ustupa mjesto konstruktivnom odnosu prema Haškom tribunalu.» Visoki predstavnik je pozdravio ovakav razvoj situacije kao korak

naprijed u procesu koji mora rezultirati izručenjem svih osoba koje je Haški tribunal optužio za ratne zločine. «Ovaj proces ne može biti okončan sve dok Ratko Mladić i Radovan Karadžić ne budu u Hagu», rekao je visoki predstavnik i dodao da «za Ratka Mladića ovo mora postati pitanje časti. Njegovi podređeni su spremni da za svoja djela odgovaraju pred sudovima, dok on i dalje izbjegava suočavanje s pravdom.»

Visoki predstavnik je naglasio da će u godini u kojoj se obilježava deseta godišnjica od masakra u Srebrenici i deset godina od potpisivanja Daytonskog sporazuma, «pritisak za izručenje Karadžića i Mladića sve više rasti svakim danom koji njih dvojica provedu na slobodi.»